

[Straßburg], 8. Februar 1548

An Johannes Oporinus

UB Basel, Fr. Gr. I 11, fol. 148r.
Steinmann Nr. 648.

Ornatissimo viro, egregia doctrina et virtute praedito, D. Ioanni Oporino, amico suo carissimo. Basel.

S. P. D. Maximam debo gratiam, Oporine humaniss[ime], tantae tuae de meis commodis sollicitudini, qui ter eadem de re intra diem decimum scripseris. Responsum meum, vel heri vel hodie te ab Hispano, qui die proximo Veneris, perendie se abitum dicebat, accepisse opinor, et omnem meam sententiam satis intellexisse. Maluissem equidem cum Hispano ipse ad vos proficiisci, totius rei accuratius cognosendae causa, sed quia pedestre iter meum corpusculum vehementer afflitit, et boni equi copia mihi esse non potest, vti malo non consultum est: expectare statui, quid respondeas. Sed si meae literae aduerso aliquo casu perierunt, respondebo denuo. Et quidem primus scrupulus mihi penè sublatus est, quum nunc planius intelligo, pueros è primis grammaticae rudimentis eluctatos, publicis lectionibus interesse posse, nec me laboribus immodicis grauatum iri, quos nec studia mea, nec tenuissima valetudo ferre possent, neque singulos peculiarem instituendi rationem postulare. Alterum etiam, iam diligentius cogitans, te nihil sordidi mihi oblaturum fuisse, propemodum amotum esse video. Spero enim magnificos dominos Fugkeros, siue qui alij sunt, a magistro non petituros, vt seruilibus ministerijs occupetur, diligenti eius cura in regendis puerorum moribus, et excolendis ingenij contentos. Tertium restat, vt de tempore conueniat. Videtur autem, non mihi tantum, sed dominis etiam fore opportunius, vt ad vnum tantum annum, intra quem vtrinque multa inopinata nunc, incidere possunt, meam fidem obstringam. Hoc tempore elapso, domini rectius de me statuere poterunt, et ego, sine grauibus causis honestam conditionem non deseram. Vale, et quamprimum rescribe. Veniam ipse Basileam, si necesse erit. Proprium tabellarium vt mitterem, superuacaneum esse putaui. Nam id vos fuisse facturos existimo, si res moram pati non potuisset. Nunc literae meae isthuc perferuntur, non quando ego volo, sed quum aliquem, perquisitis omnib[us] diuersorijs, inuenio, qui mihi inseruire non grauetur. viij Febr[uarij] Anno 48.

Hiero[nymus] Wolfius T[uus].